

南斗延壽燈儀

法事如式

具位某誠惶誠恐

稽首頓首

焚香再拜

上奏

三清上聖 十極高真

中天星主紫微大帝

日宮太陽帝君

月府太陰皇君

五星四曜星君

南斗六司延壽星君

北斗九皇延生星君

東西中斗星君

二十八宿星君

普天宿度群真

本命元辰星君

三元三官大帝

北極四聖真君

南斗延壽燈儀

清微藏書閣

五師三省真君

三界四府 無鞅聖眾

燈壇會上 萬聖千真

恭望聖慈 洞回昭鑒

臣聞

天地之德 莫大於生 洪範之疇 莫全於福 爰有主司之職 可伸

禳祝之心 仰惟三境之中 南斗為長生之府 六司之內 真君持掌

握之權 凡彼流形 歸於所宰 是以按河圖之品格 披靈寶之科儀

嚴設星燈 恭陳醮禮 宜通上境 延降高真 今弟子某心假香傳

誠惟物顯 仰瞻南極上法斗司 然寶炬之光明 以昭垂像 誦真

科而吟詠 庶獲來臨

伏願

天鑒不違 神心善應 瓊輿羽蓋 咫尺威靈 金馬瑤車 森羅空際

延生定命 克臻瑞氣之來 燭幽察微 丕示照臨之德 恭持法信

上贊神明

稽首皈依 虔誠讚詠

臣眾等志心皈命

明德宮大聖 南斗天府司命上相鎮國真君 諸靈官

臣聞

天賦群靈 均有自然之命 人懷大本 咸歸皇極之中 養之者 謝尤生 敗之者 禍因自起 永惟宰制 實在司存 倘有祈禳 宜修誠懇 今辰某洗心滌慮 養氣存神 夙懷慕道之心 仰畏在天之像 謹依科式 建立星壇 備香花燈燭之儀 歸命 明德宮大聖 南斗天府司命上相鎮國真君

伏願

天誘其衷 咸迪綿長之道 物蒙其澤 悉無短折之凶

稽首歸依 如儀讚詠

南斗司命 上相高真 包羅萬象 鎮國威靈

為天之府 左右帝臣 群仙受令 萬氣來生

金闕上宰 玉清尊神 玄元妙道 敢有不遵

萬神安鎮 衛護帝庭

臣眾等志心皈命

# 南斗延壽燈儀

清微藏書閣

洞文宮大聖 南斗天相司錄上相鎮嶽真君 諸靈官

臣聞

太極之初 道無常體 我生之後 物有定名 災祥在德 而貴賤罔差 吉凶在人 而賢愚靡間 眷茲主者 付之自然 倘施丹懇之誠 必獲洪休之報 今辰某專心正意 向道修真 仰惟成象之著明 虔仗上天之助順 謹依科式 建立星壇 備香花燈燭之儀 歸命 洞文宮大聖 南斗司錄上相鎮嶽真君

伏願

恢弘上道 默收糾察之威 普濟群生 式序修為之善

稽首歸依 虔誠讚詠

南斗司錄 天相尊神 定生注祿 保命延生

嶽神受命 總監眾靈 赫然妙道 蕩滌妖氛

蠲除惡障 保衛身形 群仙歸仰 眾妙咸明

造化自然 飛昇上清

臣眾等志心皈命

柔德宮大聖 南斗天梁延壽保命真君 諸靈官

臣聞

長生久視 乃大道之體常 祝壽延生 實庶民之所欲 在天 則常  
存而不易 在人 則命遠而不傷 欲其壽延 莫先所禱 將叩靈司  
之祝 宜修庶物之誠 今某專意致明 仰天觀象 冀神真之降鑒  
祈壽考之增崇 謹依科式 建立星壇 備香花燈燭之儀 歸命  
柔德宮大聖 南斗天梁延壽保命真君

伏願

誕佈至仁 咸迪綿長之慶 鋪張生德 永無天闕之虞

稽首歸依 虔誠讚詠

南斗延壽 為天之梁 普度萬類 咸其浸昌

壽考惟祺 億載無疆 永保天命 以除不祥

生生不滅 如陵如岡 仁愛普施 箕翼重光

與神合德 亙古綿長

臣眾等志心皈命

保光宮大聖 南斗天同益算保生真君 諸靈官

臣聞

### 南斗延壽燈儀

清微藏書閣

數分而多寡 殊多則為美 命降而長短 辨長乃其祥 惟方寸之不  
欺 庶年齡之可益 上真所掌 精意是求 今某欲增耆艾之年 欽  
若昭回之像 交於恍惚 應以形聲 謹依科式 建立星壇 備香花  
燈燭之儀 歸命  
保光宮大聖 南斗天同益算保生真君

伏願

大慈下際 長如春日之生 遐算巨增 盛若嵩山之固

稽首歸依 虔誠讚詠

南斗益算 與天為同 高明悠久 生德無窮

保茲元命 使不失中 壽考且寧 永契真風

至數流衍 福祿來崇 億萬斯年 以衛我躬

洞清上境 命駕雲龍

臣眾等志心皈命

天節宮大聖 南斗天樞度厄文昌煉魂真君 諸靈官

臣聞

二氣密移 亦有盛衰之理 五行迭運 曾無消息之機 念彼勞生

豈無厄會 真聖既司於救度 黔黎宜竭於忱恂 今某恐懼以飭躬  
敬信而瞻像 誓歸依於大道 願受度於神休 謹依科式 建立壇場  
備香花燈燭之儀 歸命  
天節宮大聖 南斗天樞度厄文昌煉魂真君

伏願

常善救人 庶潛消於災咎 永懷濟世 示陰驚以休祥

稽首歸依 虔誠讚詠

南斗度厄 為天之樞 靜以運化 品彙榮枯

文昌炳煥 以府圖書 轉禍為福 作我丹車

煉魄守神 護魂保軀 天光泰定 災厄掃除

道炁長存 聖真與居

臣眾等志心皈命

大聖宮南斗天機上生監簿大理真君 諸靈官

臣聞

真仙作德 恥一物而不知 聖道應時 為群心之妙用 降衷立命

受氣賦形 眷掌握於生成 敢恭虔而請禱 今某齋心向道 精意瞻

## 南斗延壽燈儀

清微藏書閣

天 仰思長育之恩 敢僭祈禳之禮 謹依科式 建立星壇 備香花

燈燭之儀

志心皈命

大聖宮南斗天機上生監簿大理真君

伏願

體乾坤之生德 以運化權 使性命之委和 咸歸有道

稽首歸依 虔誠讚詠

南斗上生 為天之梁 幹運造化 出入應時

職在文籍 鬼神莫窺 大虛寥廓 大理之司

自根自本 委順無虧 萬劫長存 久視不移

普天司命 上昇太微

南斗延壽燈儀竟

天運壬辰年卯月正一天師清微弟子洪鼎堅羅大英恭錄彙編

趙靈麗複校